

QUÆSTIO MEDICA,

QUOD LIBETARIIS DISPUTATIONIBUS
manè discutienda, in Scholis Medicorum, die Jovis
vigesima-sexta Februarii.

M. MATTHÆO DIONYSIO FOURNIER, Doctore
Medico, Præside.

An prima proles, sanâ corporis constitutione, felicior?

I.

OPUS Naturæ, opus esse Intelligentiæ non errantis, palam & ubique prædicatur: hæc juxta leges à divino rerum Conditorè latas, cuncta perficit quam potest accuratissimè: has nunquam prætergreditur, inviolatas & constantes servat in operibus, tam distinctè atque ordinatè, ut quasi summo regi consilio videantur. Verùm operum suorum perfectionem non semper assequitur, impedita crebrò à nonnullis causis tum externis, tum internis, & subiecto malè disposito, quorum impedimentorum occurso, à suo sæpè scopo aberrare præsumitur. Id potissimum elucet in hominis generatione, in quâ mirum est, quam rarò finem expectatum obtineat, quam frequenter in errata & deformitates labatur: in eâ etenim plurima derantur, quæ opus illud admirabile ritè absolvant & ex toto implcant. Semen quod singularum corporis partium ideam refert, cum minimè vitiosum est, & dote laudabili summâque integritate præditum, sanguis quoque maternus suppeditatus purior, omnem explent paginam; his omnia generationis bona feruntur accepta; isdemque tanquam firmissimis fundamentis constituta proles, sanitatem habet κατ' ἐξοχήν, quavis gazâ potiozem, cujus possessione dives, totam vitam non acerbam & arduam, sed beatam prosperam & fortunatam degit.

II.

SE MEN ex utroque parente decidere, ratione & experientiâ convincitur, ex cujus miscellâ mutuoque consortio perfecta generatio procedit: utriusque ad generationem hominis necessitas summa, utrumque fecundum; privatim invalidum. Id ex sanguine ad testes delato

vi insitâ testium coquitur atque elaboratur ; & ut natura partes sanguini & lacti conficiendo destinavit ; sic testes , per insigne illius beneficium , hac seminis efficiendi prerogativâ soli gloriantur . Nullibi quam in utero opus conceptionis absolvi potest : si quando in tubâ , quod rarissimum , ibique tanquam in alieno solo per aliquot menses foetus hospitetur ; ut casus ille omnino alienus est à naturâ , idcirco funestus , nec unquam contigit sine matris & foetus extinctione . Deridendos se propinant Paracelli sectatores , dum cum eo non dubitant asserere possibilem esse formationem homunculi in vitro , ex semine virili & menstruo , intra simum equinum posito . Uterus tanquam hortus feracissimus , effusum semen excipit , concipit , arctissimè fover atque complectitur . Seminis pars purissima , tenuissima , subtilissima , quæ spiritus genitoris officium sustinet , in centro stationem ponit , ibique adjuta virtute genuinâ uteri , & ejus proprio beneficoque calore , uberem partium varietatem , easdemque temperie , figurâ , situ , magnitudine distinctas delineat & explicat : pars crassior & ignobilior , membranis producendis impenditur , quæ foetum investire & circumvallare debent : quod opus singulare tantoque fabricatum artificio in oviparis clarè discernitur , germen enim ovi , refert & in se continet vim efficientem & formantem ; albumen semen est ; vitellus locum tenet sanguinis , partim ad formanda perenchymata , partemque carnosâs conveniens , partim ad nutriendum pullum , donec dulce lumen aspiciat , & pabulum vitæ sustentandæ accommodatum quærat ,

III.

PRÆTER multas animalium differentias passim apud naturæ genium Aristotelem recensitas , justam nobis eorum divisionem dedit , dum alia constituit vivipara , alia ovipara magno inter utraque discrimine . Commentum est & lusus imaginationis , hominem ex ovo formari . Scrutare hæc naturæ abdita atque abstrusa ; pro explorato habebis testiculos muliebres ex quibusdam glandulis esse compositos , quæ semini conficiendo sunt dicatæ : intra eos contineri vesiculas , in quibus semen asservatur ; hinc per vasa multum flexuosa pro re natâ deferri , aut ad uteri fundum aut ad ipsius cervicem : Et si paulò attentiores ad hæc omnia naturæ mysteria te præbeas , planum tibi fiet hæc vesiculas liquore turgidas , qui seminis naturam , colorem & consistentiam exhibet , plurimum ab ovis discriminari , hæc esse permanentes , nec habere , ut fingunt , pediculos similes pediculis fructuum : testiculos hosce præter integumentum commune , propriâ circummuniti tunica , totâ continuâ , nec ex partibus contiguis contextâ . Ecquis emunctæ naris crederet partem seminis virilis projecti & missi in uterum ,

ferri per tubam, & penetrare tunicam validam & duram, quâ investuntur testiculi, quos ovaria vocant, ut ova hæc intus inclusa fecundentur? Equis quoque serio putaret tunicam istam lacerari, ut per hanc viam saliant in tubam tanquam oviductum, distantem extremâ sui parte à testiculis seu ovariis digitorum duorum intervallo, hinc in uterum? An sine sanguinis effusione ob illius tunicæ lacerationem? An sine doloris sensu? An cum privatione voluptatis, quâ solent tunc organa generationis deliniri? Adde quod, constat *duro-ſæ* in cadaveribus mulierum, quæ multos edidere fœtus, nullum apparere in illâ tunicâ cicatricis obductæ vestigium, & in iisdem mulieribus parem aut proximè accedentem ovorum istorum numerum reperiri, ac in virginibus coævis. Hinc mirare quò novitatis amor suos rapiat Amasios, ut falsis semel opinionibus imbuti, neque audire neque videre possint, quæ alii omnes tum audiunt tum vident, & quasi furdi & occæcati in hunc errorem præcipites ruant, quem tandem aliquando delet tempus, & quæ natura homini suggerit veritati consona, ratione, sensuum ministeriis nixâ, confirmat.

I V.

QUI suprà cæteros se valere gaudet, & sui illius status bene valentis causam cupit agnoscere, secum habitat, atque acri & intento animo. intueatur suæ generationis primordia; ex quibus benefirmis corpus conflatum, & laudabilem adeptum temperiem, mirificè stat atque sustentatur. Ex harum quippe virtutum eximiarum vi, divorum simul & hominum voce laudata sanitas pendet: ex eo fonte qui rectè conformatus & bellè temperatus est, sanus esse & optimè valere perhibetur. Hæc divina bona naturalium, vitalium & animalium operum perfectio sequitur; tantum cibi & potionis appetit quantum potest concoquere, ut quibus unâ cum spiritu vita tenetur, œconomia corporis floret; nutritio partium ejus omnium ad certum numerum proccedit, & in modum arboris tenellæ, elegantis, lætæ, & bene cultæ incredibiles facit progressus; respirationem habet liberam, pulsum moderatum, sensus sanos & integros, pluribusque aliis dotibus se percipit beari, quas ipsi natura liberaliter impertivit: hanc etenim bonam habitudinem & sanam naturalemque corporis constitutionem, animi mores creberrimè consequi solent, quos solida virtus plerumque nata potius quam ficta comitatur.

V.

SANITAS ab origine pendet. prima proles hisce omnibus ditatur commodis, si salubri utriusque parentis semine & materno sanguine puriori fingitur: si in lucem producta, nutricem matrem

omni conductitiæ nutrici præferendam fortitur, quæ familiari liquore & illius congenere quem hausit in primo sui hospitio, tenellum corpusculum alat. Ex his enim ortus primi rudimentis, quocunque oculos conjicias, vigere in eâ prole vim eamdem intelliges, quæ primum illi insita fuit, nulli comparandam, si parentes habuerit plenis nubiles annis, qui fido & suavi complexu, nec non summo prolis habendæ desiderio, sacræ litavere veneri; quibus postremò nihil defuerit, tum boni habitus, tum conditionum, quæ ad explendum id opus omnium maximè naturale experi possunt. Ex iis sata hæc proles verè *évouée* prædicanda veniet: hæc neque frigore, neque aestu, neque labore facile offenditur: varium habet vitæ genus: modo ruri habitat, modo in urbe; fert omne cœlum; aëre serotino non percellitur; splendet in ejus facie vividus color, nitorque virens; mens demum ad suas omnes operationes paratior est & expeditior: sic per ætatum cursum felix illa proles, modo suæ sit salutis consultrix, & circa laborem, cibum, potum, somnum, venerem, exercitationes, moderationem servet, illis naturæ bonis dotatur; & senii nescia adolescentum statum florentem mentitur, quorum scilicet exercitia, equitatum, venatum, ambulationes, animi demum labores alacris & læta valet sustinere.

Ergo prima proles, sanâ corporis constitutione, felicior.

Domini Doctores disputaturi.

M. Nicolaus Brunel de la Carlière, Scholarum Professor.

M. Joannes-Baptista Doye.

M. Urbanus Leaulté, Pharmacia Professor.

M. Michaël Pichonnat.

M. Franciscus Picoté de Belestre, Chirurgia Professor.

M. Nicolaus Bailly.

M. Joannes Robert.

M. Ludovicus Gayant, Medicus Regis ordinarius.

M. Franciscus Vezou.

Proponebat Parisiis LUDOVICUS FRANCISCUS DUTAL,
Parisinus, Baccalaureus Medicus. A. R. S. H. 1699.

Apud Franciscum Muguet, Regis & Facultatis Medicinæ
Typographum.